

Un bunita logro pa e poëtiza Ruthy Vrieswijk-Bergen:

Su poema "true Friendship" a sali publica den e buki "Flowering Splendor" di Merca

ORANJESTAD (AAN) -- Recientemente e poëtiza sra. Ruthy Vrieswijk-Bergen a ricibi un tremendo noticia, despues cu el a participa den un concurso di poesia via internet.

E concurso aki a worde organisa pa "International Library of Poetry", y ta un orguyo pa e mundo literario di Aruba cu Ruthy su poema a worde scoge pa forma parti di e coleccion di poesia "Flowering Splendor", cu ta

un buki edita na Merca.

DIARIO a entrevista Ruthy kende a conta nos: "Nan a keda encanta cu mi poesia titula 'True Friendship' y nan a pidi permiso pa por a publica e poema aki den un di nan coleccionnan, prome cu fin di aña pasa.

Esaki ta un coleccion di hopi poema na ingles di autornan Mericano y tambe internacional.

Despues di tur e dianan di fiesta, e temporada druk di fin



di aña, e buki a yega Aruba. Cada autor a haya un prijs special pa dos buki cu e posibilidad di bestel mas, logicamente".

"FLOWERING SPLENDOR"

Ruthy a splica cu e buki titula "Flowering Splendor" ta un buki "hard cover" cu 301 pagina, di cual te cu pagina 238 ta yen di poesia na Ingles di autornan Mericano como tambe internacional.

E poema "True Friendship" di nos talento local Ruthy Vrieswijk, ta aparece riba pagina 101, y por mira cu patras den e buki, riba pagina 238 den e seccion alfabetico "Biographies of poets" tin skirbi algo mas di e dama.

"Esaki ta un paso hopi posi-

tivo y bunita pa mi, cu tin un di mi soñonan ketobay pa realiza, esta e publicacion di un buki di poema di mi propio inspiracion skirbi na Papiamentu, Hulandes y Ingles", sra. Vrieswijk-Bergen a expresa.

PALABRANAN DI DANKI:

"Pa tur esnan cu semper a gusta scucha Ruthy y recita poemanan den cuatro idioma, atraves di su programa radial "Dushi Awacero Musical", y cu a kere den su persona como un gran talento local riba e tereno literario aki, cu nan apoyo, estimulo y inspiracion, ta bay palabranan di danki.

"Y pa nan keda pendiente y carga un tiki mas di pasenshi pa pronto, Dios mediante, hunto cu mi wak e bunita soño aki keda realiza y concreta", el a bisa como contesta riba e pregunta di hendenan, oyentenan y amantenan di poema cu ta puntre: "Ruthy ki dia bo ta bin cu bo mesun buki di poesia?".

Sra. Vrieswijk-Bergen kier a gradici na esnan cu di un of

otro manera tin contacto y/of amistadnan na Merca, cu lo por facilita nan un di e bukinan "Flowering Splendor", unda nan lo por lesa diferente poema na Ingles y logicamente e poesia "True Friendship", di nos talento Arubiano conoci tambe como Lady Ruth.

SU PROME LOGRO:

Algun tempo pasa nos a conoce varios disco compacto di e poëtiza Arubiano aki, e prome den su estilo cu ta pone su voz riba CD recitando y declamando su mesun poemanan.

Y awor e dushi sorpresa cu un di su poemanan na Ingles ta aparece den e buki "Flowering Splendor" na Merca.

Manera ta conoci sra. Ruthy Vrieswijk ta un mama, esposa, y Lider Scout cu no ta para keto, pero cu hopi inspiracion ta sigui traha riba su coleccion cu hopi pasenshi.

Un dia lo mira su soño bira realidad como un luz pa rondona y ilumina e curazonnan cu ta habri pa tende of lesa algo mas di bida, sentimiento, impresion y nos inspiracion cu tin cu yuda otro den e forma romantico aki, cu palabranan cu ta bira mas y mas profundo.

Pabien señora Ruthy Vrieswijk y tur sorto di exito den bo carera literario!